



Theobaldus filius fuit Theoberti Austrasię re-
gis. Itaq; mortuo patre ipse adolescens adhuc
Austrasiam regendam suscepit, & magna gloria
administrauit. Is natura erat audacissimus, atque
bellorum cupidus. Vnde Alemannos bello pro-
strauit, & ut Agathius testatur, gentes alias uici-
niores subiugauit. In ipso etiam belli ardore, quod
Romani duces aduersus Totilam Gothorum du-
cem susceperant, animo agitabat, ut dum Narses
in Italia, & Romani simul exercitus labore & soli-
citudine tenerentur, ipse quam maximis posset co-
pijs in unum coactis ad Thracię regionem ducta
ret, atq; omnibus ibi deuastatis, bellum ad urbem

regiam Bizantium transferret. Id quod etiam magno animo perfecisset, ni im-
matura morte abreptus esset. Habebat Theobaldus quoq; Vuachonis filiam,
& paternę uxoris sororem in matrimonium, ex qua tamē nullos liberos pro-
creauit. Vnde cum septimo regni anno febre ualida laboraret, & mortuus es-
set, regnum eius ad aui sui fratrem Clotharium Suessionum regem, & Clodo-
uei primi filium deuolutum fuit. qui illud postea per duces & præfectos gu-
bernauit. Agath. Laz. lib. i. Geneal. Aust.